



09972

明魏大中著

比例陳情懇恩移贈疏

臣浙江嘉興府嘉善縣人由萬曆四十四年進士本年六月二十五日除授今職扣至四十七年五月二十五日連閏實歷俸三十六箇月例應三年考滿時奉差未回今循例補考叨蒙聖恩準臣復職臣伏讀大明會典內一款凡在京品官考滿應得本身敕命或以親老乞要移封者該部奏請定奪欽此又查萬曆二十三年十二月內該本司行人黃吉士等具疏請乞移贈該部題覆奉聖旨是行人準他移贈欽此臣仰見孝治之朝情無下而不體澤無幽而不覃爰敢俯竭寸私籲乞恩綸光賁潛德竊念臣父魏邦直伏在艸野德行純備臣祖四子臣父居次臣祖困於里徭臣父獨乾坤正氣集卷三百一十八

以身代家以立馨臣叔父染疫隣近裹足相戒獨臣父躬往視護疫亦不染臣季父始生臣祖堅意不舉臣父亟出於溺付臣母乳保卒底成立諸凡戚間雀鼠之爭骨肉之釁片言喻釋盛氣意消苦口開陳宿讐感涕迄今猶耿耿人心歷歷人口也至其仁心爲質無念不滿有感必赴授徒以養嘗自救不贖而急人之急惟恐不及又未嘗以急告人以故儲空元亮斂乏黔婁卒之日無絲粟之遺一飯之德貽身後之口獨一意教臣不以貧廢半菽不逮抱恨終天幸今遭際聖明儻懼庭闈瑣屑不可塵瀆宸嚴致使臣父生平同理宿莽臣懼滋甚用是節略梗概冒昧上聞私謂臣父孝友仁卹節廉自將如此以被明綸庶幾不辱矣查照近年本司行人侯震暘程註等俱得霑恩移贈臣今事體正與相同伏乞皇上體臣迫切至情敕下吏部查覆將臣本身應得敕命移贈臣父魏



邦直煌煌華絳寵及重泉耿耿微悰少伸萬一矣臣不勝感激仰
望之至萬曆四十八年三月初四日十一日奉神宗皇帝聖旨吏
部知道○月○日吏部合同官劉芳共疏題覆八月二十二日
奉光宗皇帝聖旨准他

懇乞聖明○□□□以作舉朝念氣疏

臣竊料今日事勢非我○□□即○蹙我此不兩立之勢○必不可
以不○也祖宗休養生息之士女俘殺慘辱耳不可聞皇上之大
辱也從征兵士如驅屠肆諸文武將吏駢首爲社稷死死不瞑目
皇上之大讐也祖宗百戰之土宇尺寸失守無以對在天之靈且
京師之倚○□□譬在人身是爲左臂左臂失則全體危○□□患
方大又不在遠○必不可不○也顧○非○不可○也金甌無
缺之天下一隅爲梗豈遂莫可誰何祖宗二百五十餘年養士至

乾坤正氣集

卷三十一

二

今日師師濟濟豈遂無一人出而制○之○諸勦伐守禦聲援移
鎮團練召募機宜言人人殊亦人人具豈盡塵飯塗羹無濟實事
獨無如諸臣受病如中風癱瘓飲啖猶故而尸居餘氣沒世不起
何耳計惟皇上赫然震怒矢必滅○時時詰問閣樞諸大臣○□
今何狀若等調度今已作何事何時可以渡三岔何時可以復河
東何時可以埽○寨何時可以繫○子與○臣○□芳等之顛
而○以之豐鼓立髮怒背面面皆東京師可藉安堵耳若徒候賊去
來爲我緩急即○氛日熾一旦投鞭而斷○之流廣寧彈丸地
南邊海東西北被○雖屯重兵亦不可以守廣寧不守而臣不敢
不爲皇上慮者不忍爲皇上告矣伏願皇上宵旰焦勞○□一念
念茲在茲當食而嘆當臥而興當懼樂而忽焉嘻吁其有縉嘉慶
之儀修太平之容者一切貶抑不忍當大棘而處之如夷庶有以

灼諸臣之木而使痛諸臣乃共怵然臥薪嘗膽求以稱塞明旨不敢惰抑聞先帝彌留之際進大臣榻前手皇上付大臣細若氣微若聲曰卿等輔爲堯舜之君言猶在耳萬一口口非干羽可格而誤皇上于不可知不思異日見先帝地下乎寇迫門庭口口聞陷亦已浹月諸勦伐守禦移鎮團練召募迄未有定畫廣寧又一無可恃皇上更不自爲計以憂勞先諸臣諸臣心日近死一旦有急恐皇上之獨立于廷也天啟元年四月十九日二十二日奉聖旨這所奏知道了

懇乞聖明發帑以寬加派併款詳議調募團練事宜以杜亂萌疏

臣竊惟皇上今日所與共保此宗廟社稷者獨民心耳民心不可重傷也傷心之久收拾已遲失今不圖更派餉徵兵茫無再計騷乾坤正氣集卷三百二十六

三

動天下欲以禦外寇乃在內不可不深慮也以臣愚計當首罄內帑夫帑何以當罄也思先帝之在東宮瀕危懼者數矣而神明護呵萬靈擁戴者數十年迨登大寶享祚不永此天意在陛下也天意所在宜其休徵協應嘉氣四塞戎翟之倫解辦稽顙而口口作難漸迫門庭岌岌有不及夕之懼臣不得其解竊疑大內之積皆當日豺虎四出椎山竭澤掘塚羅門逮官殺人吸膏吮血所致葢海內愁怨之氣所聚也怨氣所聚發爲戈矛非盡散其積無由消弭兵戎疑爲嘉祉計及今一大渙之除諸經費取辦額賦外其口口所需悉仰內帑不以煩民目前無急廣寧者撫臣王化貞道臣張應吾臺臣方震孺所請應卽遣官沛發無悞至各移鎮兵道里費若干募兵費若干城池硝磺盔甲器械費若干市馬費若干訓練犒勞費若干城中積儲費若干各衙門熟籌緩急巨細次第以

請如昏暮叩門而求水火無弗與非獨洩海內愁怨之氣應天道聚散之常亦以壯羣臣滅賊之膽得指麾如意無捉衿露肘之患無徒今日百萬明日百萬兩兩銖銖事事不暢貽異日欲用而不及用之悔也所謂內帑之當罄者此也內帑發則加派省災禔之地當蠲也徵師之地當蠲也過師之地當蠲也宿師之地當蠲也畿輔之地不但蠲加派而已似又當賜以元年田租之半何也邇年令牧繭絲爲政一旦有急暝暝小民慮無不疾視其長上而不救者重以徵牛徵車解夫解匠疲於奔命度有事能爲皇上保障沉窳產蠹而無他意乎夫京師人心亦猶是也臣故謂加派之當量蠲而畿輔京師尤宜優恤也恐尙未足以固其心也至調募之事抑又難言遼左數年敗氣不復聞調赴遼如往棄市遣行之日有對督撫大吏而悍不擇音者矣近且撤朝官而募義勇倘郡邑

守令汲於奉公保無僉派平民如發閭左而父母妻子牽號頓跌慘絕銷魂者乎此最足以傷百姓之心者也至徒募行乞費金錢而無益軍國之毫毛又不待言矣若國家有事輒仗土兵萬一不戒有輕天朝之心跋扈自雄不可控馭不虞臍噬耶艸澤鹽礦實煩有徒不戢且聚而爲盜籍之爲兵不獨禦敵且弭內患顧駕馭實難招徠未易幸今出募諸臣咸忠智材傑之士可無他虞而前車往往而有願諸臣之慎之也寧精而無多也精則一可當百少則易馭費亦稍簡也及其踉蹌首路獷悍不馴土人見之如遇強口朋搖抄掠所過爲墟往歲水兵劫船至舟楫不通米價騰踊蘇杭七郡抑價遏糴幾釀禍變且又善逃逃卽爲盜爲勝爲廣皆不可知蓋將領有利其逃而自爲逗遛地者願出募諸臣之慎之也慎擇將領嚴紀律無縱其搖虐而以傷一路之民心也遼人善降

固由內應要亦客兵淫虐羞憤勃發生不如死致然爲今之計援
遼兵將之在廣寧者悉沿三岔河而守以禦口西寧西平西興等
堡婦女俱撤至廣寧入保無涸客兵所處以傷其心男子老弱者
以乘城壯者盡藉而爲兵以待戰登萊以至天津則廣寧之犄角
山海而西各隘口以至宣大則廣寧之後勁而京師之後護也均
宜團練土著若雄邊子弟遺意以厚集其陣頃遼陽五六生員殺
賊數十結隊而行莫敢追者由此觀之厲氣所鼓卽以挫方張之
銳兵固無常弱矣移鎮之不可以已以備目前之急兼以爲擣口
地也畿輔八郡則京師之前護也宜令撫按督郡邑守令計地廣
狹多以千計少亦數百揀拔悍勁習武事者以忠力訓練成一旅
之師平居則閭閻相守無去鄉井離墳墓之嗟聞警卽守令親督
與偕來固無所事逃逃亦易跡事畢則散以歸農甚便也必守令

乾坤正氣集

卷三頁十八

五

躬督以來庶訓練精也此先臣王文成所以平寧庶人者也京師
營兵可九萬人內善戰者可得三萬人今合九萬人而人與之錢
十不如挑長材異能者三萬人而畀之日三十文也餘六萬人可
以備登陴派塚之需也嚴行保甲再得兵數萬人更檄各處巡撫
以標兵數千入衛而京師可守也且各邊鎮兵與八郡良家子可
呼而集也調募抵京者悉令詣三岔河以候大舉毋集京師畿
輔間令土著者更飲其毒傷其心而吾民不可與守也總之廣調
募不如練土著也調募之不可以已爲搗口計也顧調募之害亦
略具矣安所得廉勇仁明嚴毅之將統之而覲無他害哉臣竊不
勝愚慮慮內帑不發怨氣猶屯加派不已追呼刺骨紛紛調募四
海驛騷畿輔之間痛心疾首未平外變且有內患伏惟聖明深慮
詳擇施行天啟元年四月二十六日二十九日奉聖旨發帑朕未

管吝何得連章瀆請理財調餉豈真舍此無策蠲免仍候旨調募兵將諸款都依議申飭行該衙門知道

天步多艱需材甚亟懇乞敕諸臣以和宥言官之懇以共圖社稷疏

邇者口警告急兵曹需人特從戶部改耿如杞鹿善繼葉震生三人協理職方題覆章疏方謂可以匡司馬之不逮樞密重地調度有人矣頃臺臣雖有微言原未嘗以成心掣任事之肘況國難方殷熱血圖灑如杞等豈宜以人言分報主之忠乎至原任兵部主事劉國縉幼不自愛爲李成梁義子再起贊畫輒爲李如柏具疏游說李氏旣已甘心負國而國縉似必不忍爲負李氏之人何怪乎寺臣劉元珍之疑之也元珍以隨國縉而浮海者未必無奸細不及議收科臣霍維華以隨國縉而浮海者未必皆奸細不當議乾坤正氣集

卷三百一十八

六

棄正資參酌原無異同若候補御史劉重慶蒙旨降調樞臣將去之身似不必更貶言官以謝之言官以叅論閣臣受譴閣臣當以去就爭還重慶所以安閣臣也不然則閣臣之說長矣伏乞皇上敕元珍如杞諸臣方資幹濟無以議論自阻更敕臺省諸臣論事論人總期爲國心已共白形迹可捐其御史劉重慶收回成命仍賜候補天啟元年五月初四日初七日奉聖旨比來議論煩苛大小臣工不得安意盡職這奏內各官俱有旨了

懇敕臣工罔隅見以游蕩平疏

臣思今日合東西南北之人比肩而事皇上總以官皇上之官事皇上之事何彼何此何異何同而臣于班行中微有以徵諸臣之肺腸於矚睫方隅自域無一遠見彼一方之人與彼一方之人比此一方之人與此一方之人比三三兩兩諭諭訛訛堦墀尺寸之

地具四分五裂之象且匪獨一方也被一方之人急乘其急而徼之使有以德我而又與一方比彼一方之人合伺其隙而挑之使轉以怨彼而我又與一方比我無不構人無不孤人無不戰而我拱手而俟其敝四分五裂之中又具合從連衡之象械事機心干鋒萬鎬如此如之何不召陰陽之沴戎翟之慘耶皇上明聖沖年踐阼如日方升豈宜致此揆厥所繇實諸臣殺機致然臣誠不知誰爲此俑傳襲不替其骨已朽其鬼不靈其穢難滌其死不然其權賄自雄其子女玉帛自養而吾代之之恩恩怨主少不知憂國恥不知雪心心喙喙專急私黨而後公家臣誠不得其解臣願皇上省察大詔羣工浼濯腸胃赤心白意本務以堯舜其君急務以減口而後朝食要務以進賢退不肖其人賢不能庇一方之不賢者不賢者勿遂以彈冠吾亦無虞不賢者之或以轉局併賢者而乾坤正氣集

卷三十一

七

姑置之其人不肖不能累一方之賢者賢者無堅與護短吾亦無懼賢者之或以二心併不賢者而姑容之是還是非還非盡破方隅總歸皇極今不銷釋積毒所延憐於戈矛朋黨之禍鑒在往古臣愚實不勝心惻天啟元年五月初八日十一日奉聖旨中外多事小臣當一心營職大臣宜表率公忠何得區分異同傾擠無已這所奏著部院一體申飭

直糾邪議僉臣以明國法疏

今夫遼禍之種種自李成梁也三路之敗敗自李如柏也開鐵之陷陷自李如楨也罪無一而可原也目今河東淪沒正逮高出之日追議李維翰周永春鄭之范之日併議康應乾牛維曜之日非寬李如楨之日也况逆保所吐韓宗功者成梁之愛壻而身爲口口招降南衛者又宗功之姻則如楨不獨失事實與逆謀矣如楨

之罪無一而可原也僉都御史王德完者以法司之官當覆師失地之秋汲汲焉建楊鎬李如楨末減之議何其與於爲逆之甚哉臣猶謂如楨罪狀已著廟堂必有主持乃奉有從寬議處之旨矣此旨而出自聖裁也雖皇上聰明睿詰卓冠千古然軍國至計不可不付之外廷也議辟議宥不可不付之法司也皇上聰明睿詰雖非左右近習之所得蒙然安知無巧于爲如楨謀者若有意若無意潛爲寬解于皇上而皇上亦不及覺焉者乎往如楨嘗掛軍政之察矣內援有人數年不下今得非其故智乎何以失律大辟不由部覆而取旨如寄也然則皇上肘腋之間皆如楨之人也可不爲之寒心乎人曰以楊鎬故併寬之不知鎬不足惜也鎬爲法受惡原自爲李氏死黨也且髡兵身負重傷以逃猶曰以奸細故必欲纍纍而竿之藁街如楨之罪不萬萬逃兵哉何以輒生之也

乾坤正氣集 卷三百二十八

甚非法之平也口口未剿封疆多故人不用命亡法若此何以令矣如謂由于閣擬則閣臣又一王德完也若兩人原共在如楨線索中而爲之表裏者卽云內降何以不封還也總之閣臣不得辭其責也劉重慶參論閣臣皇上特爲閣臣削其籍李如楨破壞封疆閣臣乃爲封疆有其死閣臣何以報皇上劉重慶之譴合大小臣工入告不能徼閣臣之挽回李如楨之死一王德完單詞而遂及閣臣之寬政閣臣何以謝言官而其敢于開不避之口壞祖宗之法黨叛逆之凶者王德完爲甚德完在先朝調護宮闈一事如子慕母如子號父私心以爲泰山喬嶽也暮年再出得與同朝而笑頰迎人若倚門之妓舞腰貼地如塗面之優豈猶有典刑乎及見臺臣房可壯之揭而背面反覆兩舌喪心以側媚之態工閃爍之謀妙于逢人敢于爲惡至破除皇上之法紀割裂皇上之封疆

而毫無顧忌真小人之尤前美不能蓋矣伏乞皇上下奮乾斷立
斬如楨西市罷斥德完以爲人臣褻紀之戒閣臣韓爌止存罪案
俟票擬有人方許陳乞亦乞卽罷臣以謝諸臣皇上卽不罪臣而
閣臣之焰必焦德完之黨已集如楨之刺客死士寔繁有徒六尺
之軀知不足供其刀俎然臣獨欲爲皇上明法紀以誅逆臣臣無
怨悔天啟元年五月十一日十四日奉聖旨威福出自朝廷昨諭
朕自有見且李成梁以遼功封拜□□祖父被戕銜恨至今陷城
殺將中國不能損□一毛却將李如柏如楨相繼就斃顯是替□
報讐何以感勵邊將況原擬不無可原別謀有何確據王德完開
端聽裁意自有在魏大中職司言責亦當就事論事何得盡揜生
平塗抹輕媒人心檢刻至此亦豈奏對之體姑且不究王德完甯
用已有旨了該部知道

乾坤正氣集

卷三百二十八

九

僉臣菴旨欺君謹再糾叅以明國法疏

謹按楊鎬李如楨奉旨斬決人犯也僉都御史王德完條陳定大
獄一策微旨從寬壞法亂紀在紀法之地臣故特疏糾正乃德完
抵辯云兩請持衡原非偏重據其兩請二字卽是菴旨欺君何也
鎬及如楨已奉有刑章宜正之旨獄未嘗不定不得更爲兩也突
焉兩請是二犯有以用德完而德完敢於菴前旨而欺皇上也且
其意專言破格好生憫三犯如雞如牛如鹿爲之怵惕則是全與
之以生路飭法一語持營一今日自遁之窟耳非其本意具可覆
也德完云議處從寬皇上之綸音非微臣之意見聖旨不云今旣
如此說准從寬議處乎聖旨甚明德完何得自遁其說也蓋自二
犯成獄以來散布金錢訛言日起德完輩裂膽痛心忘餐廢寢以
謀惟以不祥之語浸流宮禁迨充衢塞路風艸皆驚而後云殺之

或反幽之亦反惟脫如狡兔可令反側自安是不爲欺皇上耶且德完旣知其內釁潛生旣知其牙爪密布風紀之司三尺在遲而反欲釋之遣戍是非黨叛而勇於爲逆耶言之及此德完可斬也至綫索表裏長安道上噴有煩言臣未敢以風聞入告啟聖天子有輕臣下心德完當自思之矣臣待罪掖垣職司封駁制敕有失得執奏封還而德完陰爲挑激且嗾輔臣內侍共起爲難德完亦叵測矣德完罄折僂搖唇鼓舌之態臣雖鄙其爲人而輕出三犯實干法紀故亟與糾正何他忿也至拾積年斷爛朝報誣臣爲李三才鷹犬汚臣名節則三才與臣從無半面之識全不相蒙踽踽涼涼臣亦自有本末幸今遭際聖明列在近侍惟知操此和衷殿爭如虎見有無禮於皇上如德完者彈之如鷹鷂之逐鳥雀此則臣之生平亦卽臣之職分矣若德完則今日當先而爲三才之

乾坤正氣集

卷三百二十八

十

鷹犬者也還是他還是他六言定已口實千古條又占風而東西易向又不知其何人之鷹犬矣頭緒旣多耳目無主爲鷹爲犬幻身旣難爲爪爲牙分身亦苦蓋自臺臣房可壯一揭安伸再揭劉廷宜三揭省臣阮大鍼一疏而已無顏爲御史大夫立風紀之堂矣待臣彈文始不能就列耶伏乞皇上將臣疏與德完疏敕下九卿科道詳議楊鎬李如楨二人是否應從戍遣奉旨議斬人犯是否復應兩請若楊鎬李如楨果係忠良楊鎬李如楨減戍果係正論臣無辭於排正論擊忠良之謫如其不然亦乞卽正德完蔑旨欺君之罪臣艸疏已竟見臺臣徐揚先有疏攻臣爲德完效死力可以知德完可以知揚先更可以知李如楨等之妙用矣容臣另疏請命天啟元年五月十四日十七日奉聖旨王德完已有旨了不必苛求該部知道

臺臣菴公狗私黨邪害正謹據疏糾叅以祈聖鑒以濟言路
疏

遼事之敗敗在楊鎬及李如楨等二月間三法司會審楊鎬依失
誤軍機律李如楨依失陷城寨律各斬隨奉有罪狀甚明刑章宜
正之旨二犯有鐵案矣頃逆犯劉于簡詞違二犯亟應正法何如
者而僉院王德完忽爲兩請至欲遣戍立功令收桑榆之效是不
但出脫之直思薦用之也而既如此說准從寬議處之票應之如
響臣是以具疏糾叅并及票擬輔臣義不容已豈不知德完擁戴
方新烈焰難犯如楨等十萬通神人爭効用而苟可爲皇上存此
三尺使後來賣國媚□之奸有所忌憚臣死不避果有臺臣徐揚
先周宗建連疏攻臣爲德完出死力爲如楨效先鋒矣揚先爲德
完護法不過設兩歸一因容形主二語不知二犯業奉宸斷只宜
乾坤正氣集

卷三百十八

七

正刑爲主何用借容只有正刑一著何用設兩至周宗建直謂德
完原是求決而臣所摘語特其發端何發端者不下二百言求決
者止三語也且德完亦已自供兩請宗建何又代爲分辯云其意
專在飭法耶總之德完知黨李如楨楊鎬而不知有皇上之前旨
揚先宗建知黨德完而不知有皇上之法紀皇上之封疆揚先等
第習德完之生平庶幾可與同濁其軟美側媚俯仰慷慨之妙度
異日必爲奏手不爲礙手之人廷杖一事又可借爲沒世護身之
符故認定德完猛力擁戴耳不知人品何常前後兩截先朝陳玠
吳時來石星等俱侃侃一時失身再出卽今日之德完亦已非前
日之德完也前日是恭請篤厚中宮之德完今日乃恭請寬議李
如楨楊鎬之德完也而揚先等尙欲效法之超除之耶揚先又詆
臣爲賣鄉里而乞諫垣人臣束身事主惟此公忠一念耳是是非

非何鄉里之可徇合愛合敬亦何鄉里之可賣臣非賣人之人亦不解如何爲賣意者必如揚先之願爲李徵儀死而後可云不賣乎抑如揚先之詬司馬詬職方以爲同心地而後可云不賣乎則夫不賣鄉里者宜莫如揚先矣而邸報流傳銓曹自擬開筵受賀如已卽眞而擠其鄉里者無所不至何以又不止於賣而已也臣賣鄉里何人賣人者何事乞救揚先實實指名無懸坐也臣踞踞孤踪獨來獨往數年使署懷刺不前行取之期奉使過里卽今候考至都非有先施不敢報調硜硜之愚冀以砥世豈揚先之擬部固從鄉人乞得之者而不覺漫以加遺耶臣疏具在亦何可哂若減口可哂是必口騎薄城下而始以厭揚先之心也發帑調募團練諸事宜可哂是必徵兵派餉海內騷駭斬木揭竿處處見告而始以厭揚先之心也和衷可哂是必廟堂之上舌劍唇槍鋒鏑攢

乾坤正氣集

卷三百十八

十一

刺如今日之害臣者而始以厭揚先之心也至所云三三兩兩諭諭訛訛之狀卽就揚先宗建等之攻臣而已描臣疏之光景作臣疏之註腳且自實其姓名矣何待臣爲之明指耶至德完乞用五臣與臣河涉德完不過度諸臣之將至出語市恩揚先又欲諸臣之疑臣劈空樹怨與德完前疏喉輔臣內臣以齟齬臣者一轍卽臣前疏所云合從連衡之象而揚先欲臣指實者也從來無言官叅論邪臣而他言官以擁戴故爲稱功頌德朋噬言官者今揚先陽尊奉者德完陰呵護者李氏良心未死而日難施揚先之頹揚先之面揚先自批之自唾之臣不屑也恩詔起用因而摧折者已非一人宗建等何幸轉念及此但德完前日之功不在姜應麟下今日之罪實在姜應麟上無再悞之頑鈍無恥出姜應麟下也伏乞皇上大奮乾斷立訊揚先何以糾連邪黨上言德政排斥正論

爲罪弁報讐并敕向宗建改行易心無以其才終其身爲小人用
天啟元年五月十六日十九日奉聖旨昨日諭戒辯爭求勝如何
又來瀆奏念其疏在論前姑免究

遵諭靜聽日久廟堂未賜處分敬循職掌再肅公案以祈聖

斷疏

臣先有直糾邪議僉臣一疏專謂李如楨楊鎬以封疆之臣而賣
封疆僉都御史王德完以法紀之臣而賣法紀故特具疏糾劾非
有讐怨于德完也而臺臣徐揚先周宗建張捷徐景濂連章攻臣
別生支節臣一再疏自明隨奉靜聽處分之諭天語煌煌凜於斧
鉞臣三緘其口者幾一月矣臣爲言官而從此以言爲戒不職臣
爲言官而言一事未竟更端言他事不職況各疏雖咸奉旨而李
楊一獄仍俟徐議則前日奉旨處分之定案今日翻奉一處分未

乾坤正氣集

卷三百二十八

七

定之旨卽臣及德完諸臣槩稱有旨槩蒙免究猶之未處分也敢
昧死爲陛下盡言之口口發難以來失事者非一人然他人之罪
罪止失事李楊之罪罪兼通夷重以河東淪沒逆保供叛輾轉福
堂懼竿首藁街旦暮不測乃各出家貲鉅萬屬其門客養士行求
卿貳臺省中彊力可憑貪橫可使者爲之主持脫卸而德完揚先
等入其賊球頗有影響臣雖不敢以疑事疑情嘗試竇陳於上前
而所云綫索表裏長安道上嘖有煩言者已褻揚先等之魄而奪
其氣於是情危膽顫頭會商謀謂不儘力護德完則不能互掩其
穢不合力殺臣則臣死不避臣口難箝然不憑空構一朋黨之禍
中臣則臣陳義甚正不足以疑朝士之心而合其力故疾呼叫號
一唱羣和前茅後勁趾高氣揚近且虎視耽耽擇人而食人人側
目人人重足矣然氣焰愈熾手眼愈出肺腸愈露長安口舌亦愈

多而不可禁止有謂德完之賄悉兼金美珠其直無筭者有謂實受萬金而居間沒其五千者數莫得而詳然以河東淪沒之後逆保供扳之時而遣戍立功開人不敢開之口此其券矣或曰揚先等皆有賂賂各盈萬或曰諸奸之賂宗建實私其半或曰景濂爲宗建捷所賣其事祕莫得而覈也然一面爲德完設策具疏一面詣輔臣畫策從寬又有其券矣從寬之旨下而居間之薦酬糾邪之疏上而含沙之射集又有其券矣旣以暮夜入金而市法又於暮夜入幕以求寬而德完則以兩請者自文以從寬者歸之綸音也揚先以票擬者失德完之美意而宗建又以票擬者當深求也張捷言二犯之有他營而徐景濂又以閣擬在通神使鬼之中也今德完已改口正法宗建等具云禍國當誅然則私金錢而翻成案者獨輔臣一人耳輔臣亦宜有以自明也皇上試問閣臣韓爌

乾坤正氣集

卷三百二十八

高

從寬之擬果否出自臆見冒世大疑果否迫於人言信爲奇著未票擬之先果否六人入幕求寬求寬之人果係何名何姓倘就中求寬之人卽係連章攻臣之人而諸奸之贓証實而諸奸之機巧敗而諸奸鬼蜮之情形睹矣皇上自是一一賜之處分首處分李如楨等之獄業經會鞫業具招擬業奉宸斷錢神雖靈鐵案難改卽今邊事方亟用兵未已而二人死有餘辜一朝出脫此後邊臣誰肯更爲國家效死力者不可以不立決也次處分王德完論獄諸疏大臣立朝主張軍國重事一語定案山嶽不移今德完諸疏具在御前初疏引恩赦引熱審勸皇上之破格好生憫二犯如雞如牛如鹿爲無罪而就死地言遣戍言立功顯爲薦用冀其桑榆之效而未帶飭法僅一二語是否求寬是否求決語氣可覆按也次疏卽已昧心尙不能一轉而卽化爲求決之說但曰兩請持衡

原非偏重而已迨揚先宗建之疏代爲之辭而三疏請明天憲四
疏速正刑章冒說誑之誅不問冒語言不一轉換支吾之誅不問
于以飾非文過誠得矣而三朝遺老以公忠爲揚先等所效法天
威咫尺恐未應面欺若是也次處分揚先等諸臣曲護德完黨攻
微臣諸疏德完旣已自供兩請何以揚先代爲展辯却云設兩而
歸一何以宗建再爲展辯却云其意專在于飭法定獄一款洋洋
滿紙張捷何以謂臣造言臣疏不過謂李楊一獄亟應議辟不應
議寬德完揚先等亦不能謂二罪之當議宥則臣疏何罪羣起而
狃狃以攻臣者何故至張捷徐景濂等極口詆誣言爭言黨無論
非臣孤子之素亦宜查臣曾薦何人旣不疏聞于朝又不昌言于
部而無風無影動引奸雄臣死不服國家言官之設專令發奸糾
隱使大臣有所忌憚不敢墮羔羊之節纍臣有所忌憚不敢萌脫

乾坤正氣集

卷三頁十八

五

兔之奸今三四臺臣相與比周公爲貪黷苟與同濁極力護持苟
與摘發極意凌轢魑魅魍魎嘯聚于青天白日之下大廷通衢之
上正論孤危人思避匿成何世道成何人心皇上不及今一爲整
頓異日有壞法亂紀之事更無有人敢爲皇上言者念此可爲寒
心也不必異日就今日而德完揚先等之奸貪恣橫自臣而外已
無復有人敢爲皇上言者矣皇上試一問之九門內外販夫販婦
兒童走卒則二犯之廣布金錢與諸奸之受贓賣法具能言其狀
也伏乞皇上獨炳離明大奮乾斷立收李如楨楊鎬棄之西市無
再延緩日久事生王德完前功已償新穢難掩急流勇退彼必不
知自圖宜勒令致仕以爲人臣受賕鬻獄之戒徐揚先周宗建張
捷徐景濂諸人職司風憲賄賂公行要挾票擬上言德政顛倒是
非欺凌孤耿所當按賊定罪如律加等亦望皇上併卽優臣以謝

諸奸但使祖宗之法紀幾頓而復申此後之邊臣知警而加愆朝
端之議論濁亂而復清所謂殺其身有益于君則爲之固臣愚之
生平而報陛下之職分也天啟元年六月十二日十五日奉聖旨
前諭大小臣工同心體國何得又有此奏姑不深究

慎會推以存法紀疏

不果上

舜有天下選於衆舉臯陶今僉都御史王德完以法紀之司當遼
瀋之陷議寬楊鎬李如楨之獄欲令遣戍立功是尙得爲臯陶乎
且一遁而兩請再遁而正法倉皇脅亂左支右吾品亦已見于天
下矣戶部添設侍郎而會推及之爲選于衆而舉臯陶耶如錄其
往日調護母后之功則當于瑕璽未彰擢以不次不應今日而有
少司農之推也雖改司錢穀或足以明其風紀之不任然而傳示
四方列在推舉夫聖主所操以馭世者惟爵與刑耳德完之失在
乾坤正氣集

卷三百一十八

六

議獄議獄之失係封疆設今日而德完推異日而二罪釋後此而
再覆全師再折大將再墮名城皆指楊李爲例無死法禍忍言耶
則皆德完之啟之也天祚聖明英臣四布必無此事然不可以不
深慮也事固有抑一人而儆千萬人者若德完之推屯邇不前猶
合士夫相戒於朝曰德完以調護舊功而再出隕望遂圖一少司
農之推不可得亦聖主所以風厲百僚也詩云召彼故老訊之占
夢具曰予聖誰知烏之雌雄今日之謂矣昔日之芳草已有漸化
而爲蕭艾者願廟堂之上三思之也卽愛德完者亦宜爲德完計
明德完以山陵畱非以侍郎畱也臣何仇於德完但懼朝無張主
民莫適從併以遣戍立功之言爲當則誤國不淺耳天啟元年八
月初六日

敬剖微衷以清蔓議疏

昨府丞邵輔忠具疏乞休謂舊撫李三才遺書當路驅除王德完等而楊李兩請皆借以罪德完雖輔忠未實臣名而糾德完者臣也然臣實匪有所借也爾時藩遼繼沒都城震驚逆保供攀根株楊李憂天者岌岌乎有不及夕之懼臣以爲罪案既定直竿首藁街而已斯何難事而圖安反側者李懷忠有孤山副總之推楊鎬李如楨有遣戍立功之請隨有從寬議處之票數日之內爵逆勸叛絡繹而見封疆正亟聖世威賞豈宜顛倒至此臣不勝危慄草奏特糾獨見二罪之必不可寬而已不知其他也何借之與有且三才久已謝事而臣始策名生平無傾蓋之識握手之交而必欲以三才爲阱于國中強推人而入臣所不服又疑移借以爲輔忠罪則糾纏亦已甚矣夫德完臣欲彈之使去者也貪冒貳卿方擬再劾會左都御史張問達過臣云德完徼三代誥封山陵之後旋

鞏坤正氣集

卷三十一

七

卽請告臣遂立焚其草已而營鑄錢之窟爲戀棧計近且壘荷溫綸矣其疏猶嘆于聖眷之未篤臣似可以有言德完宜亦無辭于臣乃臣尙畱去國之餘地以與德完謂其廉恥猶存必自引退姑未誦言擊排而且徐以觀其後也況于輔忠又何嫌而何疑矣夫朝端惟論事與論人耳事有是非人具本末不就事論事就人論人而坐之以借借則影射風捕何所不有卽臣論楊李一獄耳而張李三才之網者曰噓燼構鄒元標之隙者曰樹功擠輔臣之壑者曰希旨而不知臣一無有也臣于三才無傾蓋之識握手之交者也元標諄切于臣與德完之間舉劾所矣聞見就元標諸疏亦自明也若劉重慶之救楊李之糾閣時久已不快于臣者也責以表率之不稱固卽此從寬之旨而臣時亦以閣臣與德完同糾又何旨之希矣總之臣心甚虛而諸臣自各以其私意實之臣固一

無有也凡以臣言爲借者皆其護楊李之最深者也誠令廟堂之上以天下邪正是非爲已任其一無所借如臣疏者當與直捷剖分卽令有所借以熒惑衆聽者吾第與之覈所借不覈其所以借則借者窮而坐人以借者亦窮伏乞皇上亟敕閣部院大臣票覆章奏務就事就人各各燦晰盡斬葛藤以庶幾清明之理無徒具曰予聖而以不分黑白爲大天啟元年九月二十二日二十五日奉聖旨這奏內事情屢旨已明不必申辯近來一事牽引株連動傷國體以後宜各捐成心毋滋蔓議該部知道

藏密齋集卷一

乾坤正氣集

卷三百二十八

涇縣潘錫恩校

六

濬濠工竣疏

越自濬遼潰陷京都震聳仰屋望慮嚴諭濬濠刻期畢事維時工部尙書王佐侍郎王永光姚思仁劄屬何玉成等畫地分任自東便門始而科臣霍守典臺臣蘇述先事而司監察之役迄臣大中臣文龍代受巡閱而玉成等先後報竣暨磨筭有成數矣而臣時繁復與臣文龍代夫以一百五十萬八百一十九名計匠以一千二百八十九名計班軍積日以三萬三千一十二名計費水衡金銀六萬一千六百二十八兩九錢一分四釐八毫七絲五忽司農銀一千七百三十三兩一錢三分米三千三百一石二斗諸椿木灰磚繩斗百物及運價咸具而歛斂不與焉歛斂以歸監督盜甲

乾坤正氣集

卷三百二十九

一

厥主事沈槩收爲甲械之需而後受直於官否者不敢以冒此一役也工有詳略費有多寡而時有後先土有燥濕天有晴雨餽給有遲蚤勢亦與爲難易焉易者以程工行其節用難者以惠使鼓其子來要無不拮据瘡痍於暑雨之中而臣等今日藉手而告之皇上者也其有未盡者邊烽告急經始倥傯而濬之原未求也源出玉泉山而佃農分以爲灌漑豪右壅以爲園池其波及於濬者特其餘也濬之勢未審也水自高梁橋抵都城西北而派爲二一循城之左而東而南一循城之右而南而東宜按舊圖爲地形之高下而次第布之未可以丈尺槩也而分界任官各營其目前之咫尺於全濠灌輸深淺之宜容有未協者矣更都城渺水獨德勝門而西濠水南奔入關進衍沿洄周行大內以出玉河而今且北淤而南涸也則其脈未疏也濬之支亦未達也嘉靖庚戌築重城

以爲附則濠之深廣宜準都城而地勢既高有掘未及泉而止者更廬井按堵而一旦議恢其故不無遷折之虞且班軍非可以水部之官督也異日者國有暇時庫有餘積大司空董其屬以治濠清其源審其勢疏其脈達其支而總匯於大通橋大通而下又理葺諸閘以妙節宜蓄洩之宜而後濠有全功也以壯金湯亦以固風氣也若其原壅而不輸其流瀉而不收雖濬奚益矣然此特就濠而論濠也非所論於四夷之守也臣等以與有監察之役諸有事於濠者各以其文移會謹掇其總數開坐以聞而併及之如此臣等不勝瞻仰待命之至緣係濬濠工竣事理未敢擅便謹題請旨 計開

東便門迤北

員外郎何玉成監濬一百四十丈

工價一千

八十九兩八錢

料價二十五兩一錢七分

修水關石壩

乾坤正氣集

卷三百二十九

二

紅門銀六兩九錢八釐

共銀一千一百二十一兩八錢七

分八釐

主事張時俊監濬一百五十三丈

工價一千六十一兩四

錢四分

料價四兩六錢五分八釐

共銀一千六十六兩

九分八釐

主事劉麟長監濬一百六十一丈

工價八百二十一兩一

錢四分二釐八毫

料價九錢六分八釐

共銀八百二十

二兩一錢一分八毫

主事張杰監濬一百五十五丈

工價一千三百八十二兩

六錢 料價七兩一錢七分

共銀一千三百八十九兩七

錢七分

主事張泰階監濬一百四十五丈

工價一千一百二十九

兩七錢六分 料價三十九兩五錢三分 共銀一千二百六十九兩二錢九分

朝陽門迤北 主事吳時亮監濬五百九十四丈 工價三千

四百九十七兩三錢六分 料價六十兩六錢九分八釐

共銀三千五百五十八兩五分八釐

東直門迤北轉西 主事陸之祺監濬五百九十六丈 工價

四千七百一十八兩一錢七分六釐 料價連價四十六兩

九錢五分七釐七毫 共銀四千七百六十五兩一錢三分

三釐七毫

安定門 主事曾櫻監濬門東四百三十丈門西一百十六丈

共五百四十六丈 工價四千六百三十八兩八錢 料價

十一兩九錢七分八釐 打樁工價料價連價七十二兩八

乾坤正氣集 卷三百二十九

三

錢四分 共銀四千七百二十三兩六錢一分八釐

安定門迤西 主事劉鱗長監濬二百六十丈 工價一千三

百七十七兩七錢二分二釐 料價一兩五錢 共銀一千

三百七十九兩二錢二分三釐

主事韋國賢監濬一百七十丈 工價一千三百十四兩四

錢二分 料價三十二兩九分一釐 共銀一千三百四十

六兩五錢一分一釐

員外郎陸化熙監濬二百三十九丈 工價一千一百九十九

五兩

德勝門迤西 主事劉存慧監濬六百十九丈 工價四千一

百五十三兩七錢 料價四十三兩九錢五分 共銀四千

一百九十七兩六錢五分

西北角樓迤南 員外郎趙贊化監濬一百七十七丈 工價
九百七十四兩二錢 料價一十五兩四錢七分七釐 共
銀九百八十九兩六錢一分七釐

西直門迤南 主事張時俊監濬一百九十三丈 工價一千
五百六十二兩四錢四分 料價五兩五錢二分 共銀一
千五百六十七兩九錢六分

主事楊師孔監濬四百六丈八尺 工價四千二十五兩九
錢八毫 料價四十一兩二錢二釐七絲五忽 共銀四千
六十七兩一錢二釐八毫七絲五忽

阜城門迤南 主事張杰監濬三百丈 工價二千六百七十
六兩 料價一十八兩 共銀二千六百九十四兩

主事張泰階監濬二百八十丈 工價二千七百三十三兩

乾坤正氣集

卷三百二十九

四

四分 料價四十兩二錢三釐 共銀二千七百七十三兩
二錢四分三釐

員外郎趙贊化監濬二百五十三丈 工價一千六百四十
兩一錢二分 料價二十兩 修石閘銀一十六兩八錢
共銀一千六百七十六兩九錢二分

西便門至正陽門 主事李養德監濬一千一百二十丈八尺
一寸 工價八千九百八十一兩三錢四分 料價七十七
兩三錢六分五釐 運土價三百九十九兩九錢七分 共
銀九千四百五十八兩六錢七分五釐

正陽門至崇文門 郎中吳叔度監濬四百九十五丈 工價
五千三百九兩二錢八分 料價二十五兩二分一釐 運
土價三百兩 共銀五千六百三十四兩三錢一釐

中一段 大興縣知縣李思敬分濬七十二丈 工價三百一
兩六錢

崇文門至東便門 郎中吳叔度監濬四百九十二丈 工價

五千二百五十二兩七錢三分 料價十八兩一錢一分五

釐五毫 椿費六十兩三錢一分 運土價三百兩 共銀

五千六百三十一兩一錢五分五釐五毫

通共銀六萬一千六百二十八兩九錢一分四釐八毫七絲

五忽

重城 員外郎林案監濬五千一百五十丈 班軍本色米三

千三百一石二斗 折色米鹽銀一千七百三十三兩一錢

三分

天啟元年十月十五日奉聖旨知道了工部知道

乾坤正氣集

卷三百二十九

五

懇乞聖明亟允憲臣之推以安仁賢以重政體疏

竊惟國家將用一大臣天子不敢以自用而必付之廷推付之閣

擬付之臺省之公論誠懼一人之喜未或協于公好尤懼天子之

左右有竊一人之喜以自用其所喜而因以爲舍者于是外廷不

肖之臣厚事天子之左右以行其伎求因而竊位因而比周而既

敗貽之國家也頃都察院缺左都御史九列會推舍其察正所輕

與夫羣小所忌者慎舉有道術忠貞不二心之臣鄒元標以上僉

謂得人矣俄奉旨着再推三四員來看舉朝驚愕莫知所以皇上

豈未知元標之本末耶元標初成進士卽論劾權相謫戍以去使

再出而小貶以徇時其致此位也不待今日矣節不可撓祿不可

苟再起給事中以謫去再起吏部郎以遷去去國數十年天雷之

正壑間待皇上今日之用天數十年而留之皇上一朝而置之耶

皇上誠謂貳銓重地不可以無元標顧忠雖天植道亦不輕進退之閑惟禮與義倘成命不回人各有鼎恐不但不得一賢總憲之用併將失一賢貳銓也如之何其可也伏聞皇上念元標垂老行禮稍艱蓋元標廷杖之時原以孤忠冒死不若他之受指于中璫者可以徵金吾之庇故威譴所加傷中腰脊遂不能俯非其精神志慮之有衰憊也皇上誠眷念元標當於風雪寒暑之候赦免朝參不以筋骨爲禮不宜于總憲之擢詔部再推令元標有不安其位之意夫朝端之上得如元標者幾人元標得事皇上更有幾十年而令不竟其用耶且冢卿張問達新膺簡命首推一總憲重臣而格不用亦非所以安冢卿也幸問達侃侃自將曰此一舉也吾必以去就爭庶以終皇上任賢求舊之美自非然者將苦于內降之齟齬或又乏周嘉謨之勇退異日每用一人卽伺中涓所欲用

乾坤正氣集

卷三百二十九

六

何人而後上之而旋下之表裏關通斥陟如意自此而濟濟紳笏悉中涓之私人也二正之鑒不可爲寒心耶且內廷旣格元標而不用必其意自有欲用之人無論問達必守正不移補贖如故卽令別有簡在帝心之術奉夜半之斜封者自思其何以不得之于外自思其何以能得之于內能靦顏而就列耶伏乞皇上念老成難得計典在邇溫諭元標卽日到任受事以安其心以竟其用此後推舉悉聽外廷其有不當臣等以白簡從事慎勿以中旨用舍進退其間啟不肖之臣厚事皇上之左右以求用因而比周以貽宗社之禍天啟元年十二月二十日二十二日奉聖旨已有旨了

發覺假印疏

臣頃以次受廠庫之役二月四日入署有投四十三四兩年壽宮實收簿二冊者計銀三千六百兩有奇竊訝其年遠不可信取日

行公移按其篆文則堂印司印果贗刻也隨拘匠頭陳祿訊之供係書辦梁其經手其亦自供知情而偽印實朱兆元所雕兆元俛首無詞當將黃蠟雕印一顆比對無異方今庫藏如洗爲雀爲鼠者日眈眈伺於其旁飽於其中抑無有實心爲皇上節且慎者日受司空之贖而次第給之所入不供其所出水衡至貸帑金充泥沙之費未有償也益以僞文贗刻作奸不問長此安窮伏乞敕下法司依律科罪施行天啟二年二月十五日十八日奉聖旨法司知道

懇斥破論輔臣以存四維疏

頃臺省諸臣公劾輔臣沈淮而臣廁名其末臣與淮同鄉不二百里而近苟其行果無忤而其義尙有萬分之一之可留臣自當存桑梓後進之雅乃流聞四方真有耳可得而聞口不可得而言者繼

乾坤正氣集

卷三十一

七

以同官侯震暘之疏披析無餘淮似再無出理而聞且又當入閣矣淮何顏以對通國之人與其寮友也豈其素能悍焉于妻妾僮僕之前者其顏無不能悍焉于通國之人與其寮友之前也方悍焉于通國之人與其寮友之前而時懼人發其所深諱則必思以樹威而剪其所忌威未易以俄頃樹則必先固其身于婦寺之間而後可以爲所欲爲乃今日而其身已固其威可樹其忌可剪惠世揚罰矣侯震暘調矣臺臣江秉謙又調矣秉謙之調非以張鶴鳴之故獨以考選在邇欲令新選諸臣警威福所在機軸所操而盡摺爲我用夫皇上所用以發奸摘隱者獨此耳目之臣耳今外有強敵旁多伏奸正宜納讜容譴明示意旨發摠敢言之氣使大臣權臣內臣懷奸而不敢動而勢璫乳媪分威共權綸屏畜通家之子戎幕奉再生之父豸繡列由竇之官諸言事者指輔臣則斥

指樞臣則斥厯數去秋以來凡爲皇上勸割其推燥居濕之慈者無不謫者謫罰者罰獨夫受纍囚之金錢而鼓其虐焰者無誅焉此其故可解而不可解大非所以示風尙張四維也內廷之人外廷之人安得不盡化爲輔臣之人而皆無行義之人也目今四海戒嚴黔蜀告變腹心之蠹面情視爲緩圖臣謀不能以佐帷幄力不能以執戈矛又方抱病正乞代題于同垣之長顧俛自思惟諸葛亮方當出師上表涕泣惓惓于親賢臣遠小人而宮中有作姦犯科及爲忠善者付有司論其刑賞史鮑以不能進玉退瑕旣死猶以屍諫則臣一息尙存不敢不竊附于古人事君之義臣力疾具疏不勝激切待命之至天啟二年三月二十三日二十四日奉聖旨時事艱危輔臣渥素懷匡濟方切倚任你每妄生疑議全無影響侯震暘江秉謙處分皆出朕裁與輔臣何預魏大中不諳事乾坤正氣集

卷三十一

八

體姑不究該部知道

乞敕奉旨諸臣刻期會奏推見至隱以立大防疏

禮臣孫慎行痛先帝崩殂討舊輔方從哲以春秋之法皇上命諸臣據實會奏何以迄今未奏也蓋先帝之棄羣臣在庚申九月之朔日而率土忠義之驚心者已在乙卯五月之四日自茲日之梃不中而圖所以中先帝者百端至藏醜毒于女謁俟元精耗損獮不可支而蕩以暴下之劑燖以純火之鉛先帝之所以彌留而不起也其跡甚著何以迄今未奏也然則張差崔文昇諸人所謂先帝之賊也要使孔子而作春秋定首罪必罪在不討賊之臣何也春秋書趙盾爲弑惟以其不討賊也不討賊何以卽名爲弑以盾爲正卿也傳曰深責執政之臣然則自乙卯以迄庚申其時執政者誰討賊者誰甚晰也何以迄今未奏也且非獨不討而已酬可

灼以賞獎可灼以愛寬可灼以罰俸優可灼以養病而崔文昇者
代爲委之于先帝之宿疾至一至再夫以數十年忠肝義膽所羽
翼之元良數十日澗山窮徼所謳吟之堯舜一旦戍于二賊之手
從哲不能討反從而護之從哲真無人心者何以迄今未奏也至
張差所繇誰不知爲鄭國泰也者究主使者法之正謙調停者事
之宜從哲身爲執政如在事外聽先帝之自危自疑聽神祖之自
調自護聽亂賊之跋扈公行而羣小承風道路以目王之案何士
晉陸大受李俸諸臣禡之外之譏之困頓之而死之溥天之下必
不容有一人焉微動其忠君愛國之念稍開其誅亂討賊之口乾
坤或幾乎息日月晦而不明矣何以迄今未奏也夫賊必抽戈刺
刃形見事著而後爲賊大賊之所以漏網也春秋之法誅賊卽急
誅夫黨賊之人謂人人起而誅賊而莫之與則人莫敢勸于爲賊
輩坤正氣集卷三百二十九

九

而爲賊者孤寡弒之禍亡也今一夫奮梃曹起而謹之是何舉朝
皆黨賊者而執政者不以問也春秋之法誅意謂惡莫憚于意也
然則闖入慈慶非張差之意固鄭國泰之意也投劑益疾非崔文
昇之意固鄭養性之意也而執政者何又不以問也春秋之法誅
賊又必誅夫賊之所恃今造意者何所恃黨賊者何所恃恃從哲
也不必紅鉛之進出從哲之意而從哲久已爲罪之魁也何以迄
今未奏也然則從哲何以遂至此極也其所繇來非朝夕之故矣
蓋神祖當年不無微露其母愛子抱之端一時工窺伺而苟富貴
者圖以悅神祖必先以悅貴妃圖以悅貴妃必爲之効其意所欲
爲之事以故辛卯之密揭癸巳之竝封皆不顧順逆無復禮義歲
積根深勢傾輿廣凡內臣外臣大臣小臣舉無非國泰之人而從
哲亦其位置之人也設從哲而非其人也必不能繇徑竇以入旣

入其筮夫何能爲故屢經大逆處之不驚若與聞乎故而視爲固然者所謂爲人臣子不通春秋之義必陷篡弒之罪者從哲是也從哲非身爲逆陷于其中而不能自出者也其罪乃甚于身爲逆者何以迄今未奏也是故李可灼之藥不合之崔文昇不備崔文昇之逆不邇之張差不明鄭國泰鄭養性方從哲之罪不殺之三案不定不悉置諸罪人以應受之法先帝之寃不伸寃一日而未伸計皇考之靈在帝左右必有含憤抱痛而未安者此關皇上天性此關皇上孝治親不可忘罪不可赦卽今濟濟在廷苟非賊臣之黨亦誰不願得罪人以復先帝之讐者何以迄今未奏也且諸人之罪自具等差非有難明也法嚴造意國泰爲尤是卽戮國泰之屍礫養性于市尙不足償夫積計以傾先帝之恨獨念神祖之愛當令有終先帝之孝當爲仰體貴如當安其餘年福藩當永其

崑坤正氣集

卷三十五

十

帶礪則皇上欲安全之而詔令回籍恩之有餘于義者已多也何以置若罔聞也崔文昇之情罪宜不下于張差而李可灼次之如是而朝廷所以處從哲與從哲所以自處者可以權衡其間矣何以迄今未奏也況夫乙卯之變猶徹九廟之靈細諒先帝所以違和之故而逆謀固已行矣特先帝不無隱忍于其間卽一時忠愛之臣不忍斥言夫起居之不慎耳及今不戒萬一宮御戚畹靡有悛心衽席之間醉飽之後血氣有不及持呵護所不及到規諫所不能施間不容髮而事已不忍言矣是不軌之徒得日工其謀于法之所不能加而天地祖宗臣民所係重者日寄之于不可知之人與不可測之事而是不可知不可測者卽在於食息寢處之常也興言及此甯不寒心習御之人啟處之節時時省顧時時防閑斯亦今元老大臣之責矣思以愆後鑒在懲前何以迄今未奏也

臣非不知欽奉明旨會奏有時而側聽累月天討未章或者親履夫翰獄問安之變痛定思痛其痛倍有難言者必非以情而身家之故有所遲迴于其間而日復一日事未可知黃克纘之心路人知之矣臣不敢盡以衰世之道待今之大臣而討罪之義疾比風雷利在速斷亦將以觀今日之執政其詞賊者何如也伏乞申救諸臣卽日會奏施行天啓二年六月二十二日二十五日奉聖旨已有旨會奏了該部知道

朝儀疏

昨臣赴會極門拜疏會有選館之舉諸進士於御幄前縱橫雜坐桌椅欹偃甚有解衣卸帶片曠褻裳者臣思人臣束躬事主布武明廷嚴威儼恪莫過於此時矣皇極門皇上臨御之所肅然介於其傍且御幄前百官叩頭跪拜于茲何得僂坐褻處草野恣肆不乾坤正氣集卷三頁十九

十一

及生儒應試督學時非以敬身非以敬君也詢之往事皆云冠帶終試去御幄亦尙遠近朝端邪議幾不知有君父矣巨不可以不嚴細亦不可以不謹乞救閣部于出入儀常一爲申飭使人心知有朝廷之尊天啓二年六月二十三日二十六日奉聖旨朝儀委當整肅念新進多人姑不究朕見御門日班行人少殊欠敬慎着各衙門一體申飭不得仍前怠玩該部知道

懇乞聖明根究抄傳銓疏以覈眞僞以窮奸宄疏

昨臣辦事該科出抵臣寓道路喧傳云有托名吏部尚書張問達具嚴明考察一疏中間有語及臣臣不勝駭異謂天日杲杲之下不宜有罔兩晝行也及見抄傳邸報果有是疏反覆數四似全不解文義者又似解文義者又似實解文義而故爲是不解文義者似全不諳事體者又似諳事體者又似實諳事體而故爲是不諳

事體者似黠似蠢半譎半劇疑鬼疑人藏身露爪此其來誠不可
知而其機滋不可測矣年來世道傾危人情詭怪甲辰之妖書辛
亥之僞札以至罷官郵書問于長安幽囚走匿帖于都市皆憑虛
構形借端嫁禍扇搖宮禁荼毒朝紳網羅彌天坑坎匝地今茲之
疏安知非此等故智耶臣孤蹤子影屢犯凶鋒班行濟濟紳笏如
林而感慨多事獨以及臣知非無故而然矣萋斐哆侈誰適與謀
長此不窮流禍將大伏乞皇上敕問銓臣此疏有無真僞如此疏
果不出自銓臣乞卽敕該城提拘報房根究發抄之人直窮主使
明白奏聞按律處治無致譸張爲幻以惑亂朝政天啟二年十月
初五月初八日奉聖旨這抄傳僞疏着該城御史嚴究根因奏處
近來議論紛淆各衙門私揭發抄奉旨禁革全不遵行着一併嚴
行申飭有再犯的重治不饒

乾坤正氣集

卷三百二十九

三

慎簡卿寺以儲撫臣之用疏

臣竊惟天下大患莫大乎率土之百姓咸嚙然有莫必其性命之
憂卽今衝數方域幾無咫尺之地可稱安土矣冀少蘇其墳首頽
尾之愁怨而不至如蝸蟪沸羹之不可收拾惟州邑之守若令是
爲要非選用忠正仁明文武廉毅之臣鎮撫其地且久任之一切
貪殘之吏誰與激揚澄汰而以厝垂斃之百姓于衽席者願撫臣
推自藩臬者什三推自卿寺者什七卿寺進而貳卿者什三出而
鎮撫者什七則今日之卿寺皆異日之撫臣也當事者一意公家
惟材是求某地需某材某材應用之某地邊用腹用緩用急用一
一廣儲精核而豫布之不以徇人目前最亟者黔黔危則滇危蜀
危楚地設有觀釁而動者而楚與俱危偏沅設鎮斯亦扼吭之着
矣方且聽李樞之自存而自亡王三善之自斲而自窘張我續之

自翔而自翔而議久不決其以知兵剡薦者亦自以知兵出山而弗聞請纓之舉迺圻甸腹裏攘攘熙熙如貧子之行攫于市如所謂太常寺少卿王紹徽者順天之撫臣未缺也而思以攘臂而攫之操江未缺也而又思攘臂而攫之臣鄉之撫臣未缺也而又思攘臂而攫之熱中臆厚自喻積薪目瞬不停涎垂不止以左右望之任而愉快乎凡不堪撫臣之任者咸不當玷卿寺之班而拾級而登者若謂是固然而以干選入夫撫順之陷趙興邦猶不免於失事之誥乃至今日而宣往年之捷則身與其賞身當遼瀋之陷廣甯之陷諸死綬者死官者死法者比比矣而不與其患儼然奉常紆金而晝錦焉豈人臣之義乎明旨所以亦訝夫內轉之多也至官列郎署蕩蕩維裂檢幾於諧工狎客辱人賤行矣而躡躑

乾坤正氣集

卷三百二十九

七

卿寺大駭睹聞仲允膳夫詩人所刺恐亦非其分之所安也夫不顧人臣之義與其分之所安物議沸然褒加充耳將異日者又需次而淮撫臣耶昔甯庶人之有逆謀也人不敢以其逆聞第置王守仁于贛而本兵一聽其所請壬午浙兵之變本兵皇遽而謁輔臣蓋圖所以治兵也輔臣從容言曰此吏部事吏部又皇遽而謁輔臣輔臣曰用張佳允撫浙自定耳撫臣所繫若此之重先詎之揆撫臣者亦若此其豫也今方內多故臣竊謂皆撫臣之未得其人欲撫臣之得人先儲材于卿寺伏乞敕下銓臣自今卿寺之推務衡量材望必得所謂忠正仁明文武廉毅之品以爲鎮撫四方地毋徒一徇情面年資齷齪充位迨其有急而圖一撫臣仍推轂而無從也茲計安今日之急務也天啟二年十月初八日十一日奉聖旨方內多故巡撫官委宜擇人儲選但不必以疑迹苛求該

部知道

寺臣攘攬自供陰奸自露謹就疏剖駁以祈聖鑒疏

頃臣以百姓大命懸于撫臣撫臣之材儲於卿寺四郊多壘鮮有出其身爲皇上分此憂者旣不能于多壘之地分憂夫亦恬焉而已矣而肥美內地輒復伺軼營營攘臂思攬王紹徽其著者也故列以告之皇上而紹徽自疏其未嘗攘攬也不知其實以攘攬自供也何也紹徽自謂其杜門誦讀不問外事者也然則何以知外之有相持而下先着者知有爭先之着必曾布其惟恐落後之着持與誰持爭與誰爭先與誰先也且又何以備悉夫道款者呈身者如此其醜也則皆其攘攬之精神智數與其所邂逅而得之者也臣謂紹徽積薪自喻而紹徽果自言其資俸居儕輩之先豈非其呈身時道款時所汲汲焉而與儕輩爭者獨賴此一著乎撫臣

龍坤正氣集

卷二十九

十一

之推首論材品叅以資俸不自量其材品之在人後而徒幸夫資俸之在人先資俸誠先則偏沅之議亦已非一日矣何不慨然爲皇上分此西南半壁之憂耶況今日而尙沾沾于資俸意欲何爲臣故曰紹徽以攘攬自供也又有可以致疑者人之謝絕宴會也斯不足矜詡于君父之前乃僞疏抄傳譏臣以不沮人之宴會而紹徽逗漏此語若與相應奉旨根究方未得人紹徽之疏若神告之不適以自露其陰奸耶若蘇秦之爲人君子所不齒而紹徽致恨於非其時益駭聞聽豈其重繭於閣臣銓臣憲臣之門以爲其師游說者尙有簡練揣摩之未工而不覺爲此快快耶名之隨實如影肖形惴惴於去國之名早已自知其身之不潔而難免於清議矣擇人慎選業奉明旨撫臣必不徒以資俸論卿寺必不可以匪人叅伏惟聖明垂察天啟二年十月十三日十六日奉聖旨已

有旨了該部知道

藏密齋集卷二

乾坤正氣集

卷三十一

涇縣潘錫恩校

五

恭慰疏

十月十三日戊時皇第一子生陛下之元子也發祥中宮天地神
明宜如何呵護而奄焉薨逝舉朝怛傷計皇上慈愛性生更軫本
支百世之慮必有惻然靡甯者然皇上春秋鼎盛而宮中和氣致
祥樛木垂仁貫魚順敘蟄蟄繩繩方來未已伏惟少紓憂軫以迓
無疆之休臣等謹合詞以慰天啟三年十月十八日廿一日奉聖
旨知道了禮部知道

聖駕親郊請敕諸司倍常嚴恭以戒不虞疏

該今歲十一月朔日子時皇上有事于南郊計宗伯飭儀奉常佐
鬯金吾扈蹕有恒規矣皇天助順萬靈懼忭凝麻集慶宜莫逾此
乾坤正氣集卷三百二十

一

一時而微臣過計竊有不必然之慮以爲四郊多壘都城內外安
保無潛藏窺覷之姦且近來法紀陵夷輦轂之下白晝衡行目無
三尺而壇宇寥闕草樹蒙茸夾道填衢五方麗雜營軍禁旅僱倩
替身地曠人稠易爲姦蔽其自正陽門以南左右櫛比而居者與
壇宮之側羽衣之族守視儀牲之人宜令該城以保甲之法編爲
籍甲十家家幾人冬至以前無寓人于其室一切旗尉色役護呵
警蹕之傍而統不識伍伍不識卒其何以馭合無人懸一牌牌列
某衛所某伍下某人而統之于其長長以勲臣勲臣中選六七人
或四五人分正陽門以南與郊壇之內畫爲信地俾司譏防凡各
衙門陪祀官員所從胥史班役亦懸牌往來預文知會先期十餘
日派集旗尉人等認識鋪衍務期人與事習事與令習乘輿所臨
輕塵不聳于屯西騎肅然無譁蓋悠悠旂旌徒御不驚車攻所以

占大成也郊祀禮成嚴更未曙宜暫憇齋宮候東方旣明然後返駕皇城各門居守宿衛宮軍比常倍宜嚴切此皆臣于萬必不然之中爲此不必然之慮伏祈皇上垂省敕下各該衙門遵行天啟三年閏十月初八日十一日奉聖旨今歲親郊諸事俱宜嚴肅這本說的是依議行各衙門上緊用心料理整頓不得違誤該部知道

禮儀疏 同 理合疏

按禮科須知一款每歲大祀天地都給事中各一員入壇陪祀又一款如左右給事中署印必先具題方入壇今歲皇上親郊該科都給事中惠世揚奉命未任郊祀大典臣垣職掌所關而陪祀之員或於事體未協今有左給事中臣魏大中見署科事應否入壇陪祀謹題請旨天啟三年閏十月十九日廿二日奉聖旨署科題乾坤正氣集 卷三百三十 二

明陪祀着照例行該部知道

請申陳乞之禁以杜濫冒疏

臣待罪禮垣見恩卹濫觴迄無限制而易名彙議適當其期計欲盡破情緣一憑行業爲陛下慎惜大典苟非其人雖勢臨之禍召之衆傷之矢弗敢狗也閏十月十六日臣偕同官彭汝楠辦事該科看詳章奏有監生陳宗虞爲其父子貞請葬以圖錄廕按子貞官階四品例應得祭則業已蒙恩子祭矣請葬請廕事屬違例且例所應得者亦未嘗不參考生平維時汝楠謂子貞撫閩汎海之役開洋舉砲自焚厥師致病身斃而臣憶子貞按閩時侯官令以瀋躡聞撫臣許孚遠劾之子貞薦之一時舉劾異同公論以爲曲在子貞正卹典條例所云例雖應得而行業無稱勲勞未著者也微祭贈官已踰涯分更可一乞再乞覲葬覲廕煌煌盛典徒以饜

請乞者無厭之求耶再四商酌駁參議寢而旋有慮臣之觸其凶鋒者而臣不解也甚有勉臣骹法制劇廉隅以徇之者而臣不能也已見南直十四府州鄉紳聯名出揭爲子貞請諡宦南國稱名臣宜易名者應自有人何沾沾以子貞請也誰爲具草誰爲發抄而北者南者仕者處者生者死者咸在且宗虞自詡於鄉人徐良彥謂政府懼我票擬盡如我意微又謂宗虞故嘗賄彭惟成爲其父請諡此來實尙寶司司丞張大朴以內計被察不勝憤憤毀家捐貲託之北來爲所欲爲先於揆地將有所置捨與繆尊素丁立表諸人更出互入捏單造揭恫喝閣部院寺臺省而居其會以講張爲幻信如良彥言是宗虞真足以懼政府而臣亦果觸其凶鋒矣要其用南直十四府州之人而無忌亦其一徵也恩施之濫莫濫于今日法紀之弛莫弛于今日乞敕該部嗣今議卹以會典條乾坤正氣集

例爲例不得准近年破例之例爲例諸病故大臣例應得卹者在京本衙門掌印官奏聞在外在籍者各該撫按官奏聞無俟其子孫陳乞其非例所當得而子孫引近年破例之例自行陳乞者通政司弗與通其假陳乞爲名潛伏京師代人行賄捏單造揭將爲所欲爲如陳宗虞者乞敕該城緝究無令輦轂有伏莽之戎包藏禍心窺聞鼓鑿致玷清明之治天啟三年十一月初九日十二日奉聖旨卹典當據會典已有旨不許濫乞諡典聽禮官斟酌公論不得紛紜出揭致淆是非該部知道

請據會典議恩卹以信明旨疏

邇臣辦事該科見違例徼卹紛紛無已請申陳乞之禁以杜濫冒奉聖旨卹典當據會典已有旨不許濫乞諡典聽禮官斟酌公論不得紛紜出揭致淆是非該部知道欽此仰見聖明慎重卹典一

以會典爲據濫乞者必弗許也願必禮臣無濫覆閣臣無濫擬皇上無濫予而後天下始無敢有濫乞之人乃不十日而禮臣爲應天巡撫右僉都御史王象恒請卹奉聖旨准照例與祭一壇減半造葬欽此又不數日而禮臣爲浙江巡撫右僉都御史劉一焜請卹奉聖旨是劉一焜准與祭一壇減半造葬欽此僉都御史爲四品文官會典從無子葬之例其得葬者爲特恩特恩所加專爲侍從春宮軍功而設非人臣可得而槩徼也會典所言軍功一則曰躬履行陣一則曰軍旅身殲則未經行陣而身不殲于軍者未可以言軍功也至以死勤事會典特著夫抗節不屈身死綱常者犯顏諫爭身死國是者執銳先登身死戰陳者危城固守身死封疆者其賊池失守戰陳敗衄以致殞命者不許一槩議給而今以陰陽之患比于襄革得要優卹非典制也夫亦謂一焜象恒二臣于

乾坤正氣集

卷三百三十一

四

近世庶幾賢者皇上當不惜異數寵之夫二臣而非賢也則可二臣而猶賢也孔子何以不使爲臣顏子何以不可厚葬而今寵之以分之所不當得二臣之目從茲不瞑矣且使自今而後凡天下之覬覦非分者動以二臣爲口實則所以辱二臣者迺浮於其榮非二臣之所安也且卹典條例開載題奉欽依文武官祭葬除例不該與者立案不行外其或例雖應得而行業無稱勲勞未著則全給擬半給半給擬有祭無葬或罪過昭彰公論共棄則不問全給半給徑與立案則人臣惟其賢也而得有此分內之卹非謂賢者可以徼之分之所不當得也至人臣之賢者何必皆不經論劾之人苟劾之者非而被劾者無傷于日月正當于論定之日一爲顯白何槩以任內從無論劾爲辭則考功過也會典以軍旅身殲勲勞懋著者爲軍功則人臣之可以言軍功者亦罕矣而徒據原

疏以實其功則職方過也祖宗之法布在庶府左枝右撐冀無失隊乃人有越志而百司庶府割裂典章牽附文義共與破壞祖宗之法以徇之朝出令而夕違之瀆而無典何以塞濫乞者之路伏惟聖明申飭施行天啟三年十二月初三日初五日奉聖旨恩卹當遵照會典王象恒劉一焜祭葬是否違例着查明停給該部知道

摘議巡青要務以紓民財以仰裨國計萬一疏

臣等各准奉本衙門關劄接管巡青事務案查嘉靖四十四年該刑科給事中張憲臣等題前事該戶部覆在外各馬房獸畜糜費不貲歲終巡青科道會同本部監督官查驗臙壯者存畱其餘應揀退變易者別行議處出巡事畢覈實造冊奏繳青冊送部查考等因題奉世宗肅皇帝聖旨是這馬匹着該監務據實數開派錢

乾坤正氣集

卷三百三十

五

糧一應宿弊盡行查革揭帖不必進欽此蓋重慮夫各房之糜費而聽臣等之揀退也又重慮夫各房之叢弊而聽臣等之查革也若聽其糜費而不一爲揀退聽其叢弊而不一爲查革處處窟穴事事冒破歲歲因循曷繇振舉臣等竊不自揣于今月初九日循例浩戶部廣西司郎中賈鈞等詣壩上各房查點駝馬騾驢牛羊等畜積池之後稍與清釐其臙壯而以匹計者馬一千一百四十三駒一以隻計者駝二千二百八十有二羊二百九十以頭計者騾一十有三按會典着科道官查點實數以憑會計則此一干七百三十有一之數在二十四房存乎見少臣等一瞬之查覈更如隙駒猶懼其未實也會典各馬房俱放牧三月而今有放者有僅以半放者有僅以春放者有全不放者則費猶糜也謂宜於會派之始一體計畜估費按月扣除賣放買開之弊將不禁而自止

其應揀退變易者馬九十有二匹騾一頭牛二十有一隻會典載瘦損矮小不堪者變賣老病不堪者變賣不一而足斷應揀退變易別行議處者也而宿弊之當查革者無如驢頭驢計七百六十有八頭不知給發收養起自何年無孳生亦無倒失僱倩應點相襲爲欺積歲積欺糜金錢者無算矣一驢之養兼數驢之值傾數驢之值無一驢之養省一驢之養未始不裕數驢之用奈何冀爲欺而無變計也所當徑行裁革者也謂其不以充法從不以供大庖徒僱倩以應點而糜公帑也卽有不盡出于僱倩者通之以變賣之例可也稽馬者以其色與其印乃冊開有印而馬實無印者三十有九斯亦何謂于僱倩耶所當併入革數者也嗣後各房須於歲首將該房馬騾駝牛實數毛色印文并軍人姓名冊會巡青稜道及戶部監督官其有倒死新收一一移會如初出巡之日攜

乾坤正氣集

卷三百三十

太

原冊點驗僱倩之弊或者其少息乎至御馬監內外馬房各項馬匹具數奏下兵部轉行巡青稜道點視赫赫煌煌載在會典而芻豆問之司農馬匹不關于司馬司農歲按故額而予之估值日加幾及二十萬夫安有費幾二十萬而不一問者則執會典而問之內廐候司馬覈數巡青點視然後按實數而予以飼秣之需其未以實數聞司農止芻豆勿入蓋司農今日而匱乏極矣不塞其漏源于何開欲以塞漏請從茲始伏乞敕下該部一一覆議施行天啟三年十二月十六日十九日奉聖旨着遵照舊規不必裁減該部知道

循例舉劾有司官員疏

臣等巡青事竣舉順天七府暨山東河南二省之有司而殿最之例也然就此七府二省中其州縣無京糧子粒相關涉者雖賢弗

敢及也有抵任未幾能舉積疲積逋之賦而徵輸踰其舊者竊心旌其能然抵任未幾弗敢及也身猶在事而名已列於行取之啟事者弗敢及也其可得而及者謹據冊報之完欠叅以賢否一一爲皇上陳之北直隸則景州知州張志芳保定府同知管易州知州事武之楨開州知州董象恒定州知州田于野晉州知州董之表霸州知州陳廷策昌平州知州徐士俊安州知州牟脈新魏縣知縣陳序大名縣知縣魏自滋任邱縣知縣單明詡內黃縣知縣吳煥滑縣知縣王任杰曲周縣知縣趙允昌河間縣知縣湯景明南和縣知縣高斗光眞定縣知縣李挺清豐縣知縣潘士聞清苑縣知縣王鼎新東明縣知縣史高允獻縣知縣顧一讓邯鄲縣知縣靖科元元氏縣知縣臧爾合濬縣知縣趙建極長垣縣知縣仇夢台東鹿縣知縣王永壽邢臺縣知縣張毓泰南樂縣知縣蔣向

乾坤正氣集

卷三百三十

七

榮雄縣知縣黃宗昌南宮縣知縣黃綱咸縣知縣馮大任安肅縣知縣李師沆高陽縣知縣唐紹堯定興縣知縣王永吉武清縣知縣畢生輝廣平縣知縣王國祚固安縣知縣程宇龍獲鹿縣知縣喻思慥藁城縣知縣譚國宦東光縣知縣楊應震任縣知縣李繼恩慶都縣知縣原秉謙滿城縣知縣張珍鹽山縣知縣馬泰伸鉅鹿縣知縣沈時亮唐縣知縣張應泰清河縣知縣于從政懷柔縣知縣荆可楨肅寧縣知縣劉賁卿完縣知縣王敕靜海縣知縣王良相阜城縣知縣王秉衡甯津縣知縣魏家相新城縣知縣鄭國禎棗強縣知縣李時新高邑縣知縣劉得壽井陘縣知縣馮淳肥鄉縣知縣楊時晦新河縣知縣薛永甯故城縣知縣咎雲鵬平鄉縣知縣田峩順義縣知縣陳安民山東則沂州知州晉承眷泰安州知州于可久莒州知州甘露濟南府同知管濱州事王應脩甯

海州知州林奇襟武定州知州韓炳衡東昌府同知管蔭縣事李
自蕃陽信縣知縣竇星益都縣知縣王夢尹壽光縣知縣王孖濟
陽縣知縣李作又滋陽縣知縣李政脩金鄉縣知縣張著銘樂安
縣知縣胡克開淄川縣知縣郭捍城蓬萊縣知縣汪裕諸城縣知
縣胡福宏沂水縣知縣陳廷謨聊城縣知縣馮運泰德平縣知縣
楊子鳳青城縣知縣李洵瑾肥城縣知縣王惟精昌邑縣知縣李
鳳掖縣知縣王應豫禹城縣知縣姚德溥福山縣知縣袁希顏棲
霞縣知縣金汝聲博平縣知縣璩光孚蒲臺縣知縣鄧希臯夏津
縣知縣任尙約單縣知縣李穎發臨朐縣知縣郭人吉陵縣知縣
路應聘平原縣知縣賈師達邱縣知縣高繼凱利津縣知縣周日
強嶧縣知縣徐宏基曲阜縣知縣孔聞簡商河縣知縣王之賢昌
樂縣知縣劉養粹鉅野縣知縣方時化齊東縣知縣李燦然蒙陰

乾坤正氣集

卷三百三十

八

縣知縣蘇淳然齊河縣知縣陳一封海豐縣知縣王禎館陶縣知
縣翟化儒恩縣知縣賈逼眞范縣知縣吳可久卽墨縣知縣程調
羹黃縣知縣張所性莘縣知縣王燮元河南則許州知州王守履
磁州知州張涇鄧州知州韓焯兗州知州羅懋湯陳州知州許纓
高邱縣知縣孫傳庭太原縣知縣李之茂祥符縣知縣李喬商城
縣知縣曹延諮嵩縣知縣楊鼎樞汝陽縣知縣楊文昌通許縣知
縣安良澤固始縣知縣高捷永城縣知縣劉鎬陳畱縣知縣韓一
良登封縣知縣劉安行杞縣知縣黃世澤唐縣知縣王文清臨漳
縣知縣何可及雒陽縣知縣張第元光山縣知縣梁炳儀封縣知
縣許國翰長葛縣知縣李春旺靈寶縣知縣田時震南陽縣知縣
白聯芳河內縣知縣張樞彰德府同知管湯陰縣事楊樸密縣知
縣張濤新安縣知縣解應元襄城縣知縣張夙行宜陽縣知縣王

廷議內鄉縣知縣董爲夏邑縣知縣馬希周偃師縣知縣李希曰
息縣知縣胡棟輝縣知縣王庭諫中牟縣知縣段耀然葉縣知縣
王者佐尉氏縣知縣及濮汲縣知縣郝效召甯陵縣知縣賈昌虞
城縣知縣宋文燻考城縣知縣王用士孟津縣知縣靳光宇盧氏
縣知縣顏日愉浙川縣知縣饒可久郊縣知縣王紹翰蘭陽縣知
縣曹懋孝南召縣知縣徐三良桐柏縣知縣宗若愚以上諸臣皆
過都歷塊之才而求牧與芻爲事若馭六朽如烹小鮮急恐蹈夫
賦蛇緩復虞乎害馬爰輸地出以秣天閑儲思馴牡于臧仰佐塞
淵之理所當薦揚以備擢用行取之選者也內學生輝廟一讓于
可久完未及額而治行有聞濱州王應脩原議地方災疲苟及八
分卽得免于吏議李自蕃李政脩方時化孔聞簡以亂後請蠲未
蒙俞旨始開徵不得爲諸臣罪若自蕃之拮据亂滕且撫且治

乾坤正氣集

卷三百三十

九

以上則有若寶坻王應泰交河毛舜嶽未完二分以上則有若滄
州朱學孔霑化李心量鄒平劉紹芳未完六分以上則有若青縣
陳克光未完八分以上則有若裕州劉世甯未完十分則有若鄭
州署州事開封府同知柴游泗而霑化原以災疫免徵者三分學
孔克光紹芳所逋無多姑與免議舜嶽旣已物故若王應泰則臣
等所爲心旌其能而特限于俸者也若逋至八分以上安得復托
之撫字以爲解世甯游泗均不得逃其責最可異者東平州曹州
陽穀縣魚臺縣平陰縣壽張縣曹縣東阿縣不請于皇上不白于
司農不聞之臣等擅支二千九百餘金供餉徑自開銷非法也誰
爲擅支誰爲開銷宜不在州縣之長不可以不一問伏乞敕下該
部再加查議如果臣等所言不謬將張志芳等移咨紀錄劉世甯

柴游泗照例罰治東平等八州縣仍責以何項錢糧抵償解納不准銷算懲勸明統紀亦明矣天啟三年十二月二十六日二十九日奉聖旨□□□道

酌議滇黔考試官疏

越自萬厯乙酉以來每郡國大比士遣京朝官典其事滇黔二省各遴主事一人主之副以行人休明之雅觀也屬者西南第靖道路爲梗竊計典試之臣非如以守土往者以巡方往者以勦賊往者可以飭護行可以備一旅踽踽涼涼蹈虎狼之窟儻變生不測遠不能至大事誤矣臣愚以爲雲貴在今歲宜暫做壬午以前故事敕彼中撫按官便宜辟召或旁近隣省可以計程至者或卽于司道府中擇其暇而有文章者或卽于提調監試四人中省二人

卷三十一

卷三十一

十

人潘士遴充雲貴詔使路已非昔日之路差復仍合併之差雖士遴叱馭而前計不反顧而土著者去其口巡方者優其擢獨士遴捫參厯井辛苦口中同爲王臣者不無代爲惻焉動翩離之感臣故以爲今日典試之役要期于無誤大典而已遣京朝官未必不反有誤也暫停弗遣恤臣私也節郵傳也且有壬午以前之故事可循也伏惟敕下該部酌議施行天啟四年二月二十五日二十八日奉聖旨該部卽與議覆

09972

